

Visoki predstavnik razgovarao sa Upravnim odborom o ustavnim amandmanima

Nakon usvajanja ustavnih amandmana u Narodnoj skupštini Republike Srpske 4. aprila 2002. godine, visoki predstavnik Wolfgang Petritsch danas se u Sarajevu sastao sa Upravnim odborom Vijeća za implementaciju mira, na ambadorskom nivou.

Upravni odbor je izrazio punu podršku iscrpnim naporima Visokog predstavnika koji imaju za cilj osigurati da ustavni amandmani koji se trebaju usvojiti u oba entiteta ispunjavaju zahtjev da su u potpunom skladu sa Sporazumom o provedbi Odluke Ustavnog suda Bosne i Hercegovine o konstitutivnosti naroda, koji su postigli politički lideri BiH 27. marta 2002. godine u Sarajevu. Odbor je također sa zabrinutošću primijetio da je istekao rok – prva sedmica aprila -, do koga su entitetski parlamenti trebali u potpunosti usvojiti amandmane.

Visoki Predstavnik je izrazio ozbiljnu zabrinutost u vezi sa amandmanima koji su usvojeni u Narodnoj skupštini RS. Amandmani nisu u skladu sa, niti u potpunosti odražavaju Sporazum postignut 27. marta 2002. godine.

Visoki predstavnik ponovo naglašava zahtjeve Upravnog odbora sadržane u komuniqueu objavljenom nakon sastanka Odbora održanog 27. marta 2002. godine, nakon zaključenja Sporazuma. Upravni odbor je konstatirao da *“očekuje da sve stranke aktivno osiguraju da se sadržaj ovog Sporazuma u potpunosti provede putem ustavnih amandmana, koji će se usvojiti u parlamentima oba entiteta. Amandmani na entitetske Ustave moraju se usvojiti u obliku u kojem su u potpunosti u saglasnosti sa Sporazumom koji su postigle političke stranke 27. marta 2002. godine”*.

Kako bi olakšao iznalaženje rješenja u skladu sa zahtjevima Upravnog odbora, Visoki predstavnik se jutros sastao sa liderima stranaka iz Alijanse Zlatkom Lagumdžijom, Safetom Halilovićem i Krešimirom Zubakom, zajedno sa Cliffordom Bandom, ambasadorom SAD-a i Rafaelom Valleom Garagorrijem, ambasadorom Španije, zemlje koja trenutno predsjedava Predsjedništvom EU. Visoki predstavnik je podsjetio političare iz Federacije da imaju obavezu nastaviti sa aktivnostima u vezi s donešenjem amandmana na Ustav Federacije, bez odlaganja.

Sutra će se Visoki predstavnik sastati sa liderima četiri stranke i predstavnicima iz RS koji su učestvovali u pregovorima koji su rezultirali Sporazumom od 27. marta 2002. godine.

Visoki predstavnik koristi ovu priliku da podsjeti sve stranke koje učestvuju u ovom procesu da su pregovori okončani 27. marta 2002. godine. Ne može biti više nikakvih daljih pregovora. Sporazum od 27. marta mora se što prije usvojiti kako bi se na vrijeme mogao kompletirati Izborni zakon.